

PIERO DE GHETTO DE ROCHE DE LISEO (1932)

### Stefano.

L ameda Pierina l aea an cian, cuatro o zinche iates, tré oches, an grun de conice, doi ciaures, sié fedes e n ciapo de pites. Can che deo a la ciatà, vдео tanta otes an riedo de tré o cuatro ane che duiaa beato a pede la sò besties. Da mi l aea sodizion e no l parlaa. Al me vardaa e l tasea.

L ameda Pierina la m à dîto de ci che l era e che l aea inon Stefano.

In chel inverno son dù a sià ia la Vares de Vilanuova e èi vedù Stefano iazà come n crò, coi sie ize pè, davesin del gancio che l vardaa ci che dea su e do.

Zenza dî nîa i èi netà al nas, i èi sfregolà le man col nieve e daspò me l èi betù intrà la ianbes e l èi menà su col gancio fin su in zima.

La paura la i era passada e l à scominzià a dî su solo, anche sul gancio gran de Ciariol. E l à ciapà na passion mata de sià.

Daspò de inchelota, can che l me vedea par strada, l aea i guoie che ridea e me penso che n ota al m à dîto anche "Ciao"!

Poco tenpo daspò Stefano al s à malà e l à cognù dî in paradîs; massa presto e prima de l ora.

Íó son convîto che see an paradîs anche par la besties, se no autro parcè che les no sà ce che see la cativeria e, de seguro, cheles de l ameda Pierina les é dutes lassù.

Sarae anche bel se in paradîs al neveasse: chel bel nieve suto e farinos.

Nò par nia, ma an paradîs senza besties e agnó che no se può sià, ce paradîs saraelo. Vero Stefano?

(Borcìa)

LUISA MANFROI (1968)

### La s-ciona del orco.

L era i ultim dî de novembre.<sup>1</sup>

En dî el Zilo Ghisèl, en om da Zelat, l avea chela de dî fora a Zenzenighe a la fiera de Sant Andrea.<sup>2</sup> Ma sua femena, la Zieta, la g à tant dît: "No stà dî fora a pie davant medodî, se nò te rive inte dopo not. L é meio che te vade fora sul tardet!" "E ben ! – el g à respondù – Spetarai!"

L à scoltà sua femena e l à spetà drio medodî par se envià. L é dut fora par la strada de Mulan, l é dut du par le ote de Van de Col, l à passà fora el pont, Bonarùca, Tavèrnole, l Atriol de la Cros e enfin l é rivà a Zenzenighe.<sup>3</sup>

Co l é lugà, la fiera la era ancora abbastanza bela. La "fiera de Sant Andrea" l era la fiera dei animai: l era cavaì, mus, caore, fede. Entant sto Zilo l avea catà altri om e el s avea pert via a ciacolà: en soci un, en soci chel aoter, don a se beve en got cua, don a se beve en got là, ensoma l era not e l avea ancora da tornà a casa.

"Tocarà me envià!" l à pensà a na zerta ora. Ma ormai el s avea fenì fora i soldi, no l avea gnanca pì na palanca; chel che l era pedo, no l g avea ciot nia a sua femena e a chi tosat. L era anca en cin bandol parché l avea bevù en mucio de chènò.<sup>4</sup> "Po ben! Diron en inte pan pian!" Inte par strada, co l é rivà a Mulan, là da la siega l à sfrazà inte par le scarsele e l à catà ancora na palanca. Avé da savé che apede a la

1 La *s-ciona* è raccontata dal sig. Renato Della Zassa, guardia comunale di Vallada Agordina, da qualche anno in pensione. Della Zassa, della famiglia dei *Moriàch*, oltre che un cultore del dialetto è un esperto conoscitore di Vallada e una fonte di aneddoti e racconti che gli hanno trasmesso i *veci* del posto; una comunità che lui ironicamente definisce "l'Università", che gli ha consentito di venire a conoscenza delle storie passate e di tramandarle a sua volta.

2 La "Fiera de Sant Andrea" ha luogo a Cencenighe il 30 novembre. Era conosciuta per antonomasia come la fiera dei cavalli. Un'occasione per la gente del posto e dei paesi vicini per acquistare equini, in vista della prossima "becaria". Da oltre dieci anni la Pro Loco di Cencenighe ha riportato in auge questa fiera tradizionale, trasformandola in una rassegna delle razze equine.

3 Il nome *Van de Col* trova origine in un affossamento naturale della zona sita in comune di Vallada Agordina. *Bonarùca*, per Silvio Pellegrini ("I nomi locali della Val del Biois", Leo Olschki editore, Firenze, 1977) indica una località nei pressi dell'*Atriol de la Cros* tra Vallada e Cencenighe. Il termine si riferisce probabilmente al "crescione". Nelle vicinanze si trova "Tavèrnole", prati alla destra del Biois la cui presenza è attestata, secondo Pellegrini, fin dal 1361.

4 È il vino.

siega l'era na ostaria. "E ben! Dirai inte a me beve en got: tanto, ormai, chel che l'é fat l'é fat!" l'ha dit.  
 Par fala curta, l'é dut inte, el s'ha bevù sta palanca e dopo l'ha passà el pont. Sora el pont l'era en casel di Ghisiei onde che se catea le strighe. Là le balea, le sonea, le cantea, ma no le volea che nessuno i le vedesse. A sta du nte strada el le sentia e allora gh'è venù de dì su a vardà inte. Entant che l'alonghea el col pì che l'podea par coriosà, una la lo à vist!  
 Caro mio! Cande che el s'ha nascort l'è venù du, la fat el saot del mur. "Oh Dio – el dis – una la m'ha vist! Sucedaralo chè?" Oramai la é fata. En cin balucante el v'ha en su.  
 L'era en bel ciaro de luna. Sot la ota de Van de Col l'ocio ghe porta da bas. L'era na bela bala!  
 "Farala chè là na bala nte strada?" El v'ha via par vede meio: "L'è en gem de fil!" el dis.  
 "Ma varda che polit! Son proprio content! A fiera no g'hai ciot nia a la femena e a chi tosat. Co sto gem de fil la Zietta la ghe farà almanco en per de caozet!" E el se lo met nte scarsela.  
 Pan pianot el ciapa el troi e el riva a Zelat. El girolea en cin dintorn prima de dì da inte a casa.  
 "Pèta! – el dis – Varde nte scarsela che non me l'ave pert, sto bel gem de fil!"  
 El met la man nte scarsela e po el la tira fora.  
 "Ma che fret e umido che sente!" El ciapa coraio, el torna mete du la man e el tira fora chel che l'era inte:  
 "Ma! .....Elo chè cua? ....." El varda meio e pien de marevea el dis a gran vers: "Na scarpotola de mus!"<sup>5</sup>  
 La scarpotola la s'avea anca en cin desgiazà a stà nte scarsela.  
 "E ben po! Che ensemenì sone! M'ave ciot su na scarpotola de mus po?" El ciapa e l'ghe caza via na scarpada.  
 La scarpotola la v'ha via e la v'ha a bate nte la magnadora del porzil del Tini di Tach.  
 Propio ente chel mentre el sent tuta na bacanada: "Ah, ah! ah! ah! ah! ...."  
 L'era l'orco che g'avea mandà su le strighe par castigalo! Da la paura che l'ha ciapà el se l'ha fin fata nte le braghe.  
 Cande che l'è dut a casa e che l'è dut inte par porta, allora allora la fin de la s-ciona la é stada proprio bela.  
 Sua femena, appena che la lo à vist en te chele condizion la g'ha osà: "Condut de n vege! Te t'ha enpienì le bigonze! Te ghe n avarà bevù assai sbòrz."<sup>6</sup>

(La Valada)

ANTONIO ALBERTI CUCIARIN (1946)

## Tèra mees

Cemodo feje a no te pensà  
 tèra mea che te sos inpiombada  
 del corpo dei vece,  
 anche chel de mè mare,  
 ignante noma che ospite,  
 ades duto un con te medema:  
 tèra soa e tèra de ra mè tèra.  
 Tèra su de agnó che ujora  
 (spirito che no n'ha pasc)  
 el saé vecio e chel noo:  
 ra parlada con tropo passà  
 e ci sa cal davienì.  
 Aah, se me fosse dà de vede  
 el mè ego, nesc, senza corpo  
 sin 'sì inze par fora,  
 de ra bianchiza sfarìa  
 che ra se sara su intor de el.  
 Ultima porta par ra steles:  
 ruà infinalmente ai antiche.  
 E el mè fagoto vanzà là,  
 scuerto su da un sudario

5 *Scarpotola* indica lo zoccolo.

6 Come *chèno*, *sbòrz*, nel linguaggio dei seggiolai (*i conze*), è il vino.

de cristai bianche; infinche  
el corpo no deentará tèra;  
tèra de ra mè tèra. Par senpre.

*(Anpezo)*

PIERO BRESSAN BERNARDI (1920)

### **L era l tenp.**

L era l tenp che zovenot  
aspetion vegner la festa  
co le matità te l cor  
e le tose par la testa.  
El nos svago, cuel pi bel  
al de fora de l cantar,  
la domenega de sera  
de scondion se ndea a balar.  
Te na stua arbandonada  
su la banca del fornèl,  
el sonea el barba Cici  
en sol valzer, senper cuel.

Con n armonica scardegna  
e coi pie l ghe dea l codan,  
con gran moto l slonghea i braz,  
l batea i tasti con le man.

Cuela musica poreta,  
l era balsem, ma proibì,  
no i volea i carabinieri  
e anca i preti nia de pi,

che se n dè i vegnia a saver  
da le babe in confession,  
no era santi che cenìa,  
no i ne dea la comunìon.

Sto ricordo del passà  
se a la ment l ne vien ncoi  
l pararà na fantasia,  
ma vivest l aon proprio noi!

*(Gosalt)*

### **LISA DE LUCA Colvignàs**

(Ricordo delle gite a Colvignàs, presso la "casa vecchia della Gigia", dove passavamo tante giornate alla scoperta di giochi semplici e antichi e dove tutto veniva vissuto come una grande avventura.

*L era na agitazion massa granda da spiegà,  
mi de cusì grande no ghe n ò pi provà.  
Se ciapea su el dopomedodì,  
e co se rivea se parecea le robe per dormì.  
... senza desmentegasse el secio per fà pipì!  
Co ben se avea dugà,  
se se parecea per magnà:  
me vegnarìe da piande per l emozion*

*se podese saià ncora na olta chela pastassuta col ton!  
Tut era inportante  
fat cusì e cusì,  
te ne disea robe grande, che no se podea capì.  
Ma l'era bel, n'bel che no se sà,  
no l'é nia ciapà l'aereo o tragheta,  
chel l'era n'viaz da recordà,  
el viaz de la felicità.*

*(Agort)*

ANNAMARIA DE MICHIEL

### **Chela strolega de Nana.**

É la fin, cuasi de otobre,  
e le femena è inte i cianpe,  
a curà su le patate.  
prima che la tera giaze

Cuanche al sol taca a dì sote,  
una a l'ota, torna a ciasa  
e anche Nina, pian pianeto,  
la se invia verso la stala.

L'è un tin straca, tavanada  
e no l'ha finiu dornada.  
L'ha da dì a monde le vace  
e pò core a portà al late.  
La camina a testa bassa  
col so dei pien de patate,  
col peso dei pensier,  
l'ha la goba anche par chel.

Ditolfato, da un cianton  
la se siente sbegarà:  
"Vien ca, Nina ... paussa un tin ...  
vien con me, ca su la bancia."

Nina vede là sentada  
chela strolega de Nana  
che no sà che fei del tenpo,  
che no à mai fato fadia  
e la passa le dornada  
a babà ntrà le contrade.

Nina pensa "*Che eve fato  
a passà proprio de ca,  
fareo meo a dì do pal troi  
anche a costo de tomà!*"

E chel outra, là sentada,  
sbegarea "*Vien ca ... che fasto?*"  
*É un bel tin che no te vedo ...  
Ma te sesto anche ingrassada?  
Te as metesto su un bel cu ...*

*E i to fioi? Fali giudizio?  
Chel pi vecio elo a laurà?*

*O te tolelo la vita?  
Stalo senpre là a paussà?"*

Nina é stada ferma, in pè,  
là, poiada su la sapa.  
No l'à ancora vèrto bocia  
parché Nana no la lassa.

L'è tentada de risponde,  
de risponde malamente,  
ma la pensa che é meo tase,  
tanto pi con zerta dente.

Nana intanto parla ... e sparla,  
con la lenga la laora,  
pò de corsa rua so fia,  
no ve dio chel che vien fora.

Nina pensa a cuanto tenpo  
biciou via a scoltà monade ...  
*"Era meo di do pal troi,  
anche a costo de copàme!"*

*(Lorenzago)*

GIACOMINA DE NARD  
**A la mare.**

Col gropo ize l'col  
vardo la to man,  
crodes scavades da inverne de iaza;  
scorzes de pezuó  
sfentes dai vente da monte.

L'è puora man,  
fruades da fadies benedetes.  
Les sà da late appena monto,  
da erba seada  
prima del levà del sol,  
da margaretes portades de maio  
sul altar de la Madona;  
da polenta dala  
che fuma ize ciaudrin,  
de canela e garofui  
de la torta de iussa,  
da darlin de biancaria  
lavada ize brente,  
da legnes pienes de rasa  
che brusa, rosses sul larin.

Les sà da bon la to man,  
come duta la to esistenza;  
neta come an lanzuó  
partì ize lissivera,  
e scarà al sol.  
Daparduto, agnó che vado,  
par cuanto dalonde che te sees  
i to profumo de n'ota  
me i sento ize daos,

mare,  
parcè che anche ió  
són parte de la to essenza:  
són na goza che te as regalà  
col cuore, a l indoman  
che à da ienì.

*(Borgia)*

LUCIO FEDON (1980)

**La vecia col cai.**

Sentada su la bancia  
de len marz  
fora da la ciasa  
de pera bianca,

negra, negra, negra,  
te le fifole,  
te l sial,  
su la testa straca,

te fume l cai,  
co le fifole sbreade,  
vecia nene,  
e te varde lontan,

de la de le crode,  
de la de le val,  
e te te sère te l sial,  
spietando la fauz,  
che la sbrea  
e che la taia,  
serada te l mostaz,  
te spiete l porteà.  
*(Domeie)*

SANTINO GANZ (1947-2012)

**Leisinpòn.**

Sòn partì co na valis de carton  
par dì a leisinpòn  
tanti agn fa  
da doven a me la guadagnà  
A ciasa i avea na boca de manco da sfamà  
così tanti come mi ...  
e sòn stat via tanti dì  
L è passà i mes o no vedei l ora de tornà  
con en franco inte scarsela  
e le straze da lavà  
Arivà verso el confin aria pi bona  
... ma la ciasa pi vesin ...  
ripasse tut co la ment  
e vive pi content  
ades che sòn tornà al mè paes  
en mez a la mia dent ...  
Vede tuti i dì el Focobon  
e no voi pi partì  
Par leisinpòn ...

*(Falciede)*

RIZIERI LUCIANI (1957)

**Canal Agazon.**

L era i prim de novenber del sessantasie  
parecea a tenpià,  
onde ereli tuti i nonzoi del Agordin?  
Parchè n chel dì no i à sònà le canpane?  
Tort marz, colpa grama  
cossita strighe e strigogn  
i à godesst del malfat  
l é suzedù l patatrac  
*"a te fulgure tempestate"*  
na gran brentana  
Canal Agazon.

Biois e Liera che nas gaonei  
da le crepe poc lontan e  
i passa n Canal ancora popi  
sarevede co l piof, pi sora la nef,  
i sbrodega, i sdrava, i spanz  
i cres fora de misura  
i trà al catif, i diventa bestie

Me sovien doi bisse grande  
doi ande che andea de anda  
ande che le era boa  
bestiaze comandade da valmai  
boe co ondade sboade  
ande co ganassee de azal  
furiose cative le mordia, le rutea  
nsuriade le stofea da solfer.

Ciapà l brut andaz  
le se portea via tafat:  
tera, zope, alber, tabiai,  
sas, case anca carne  
anca cristiagn desgraziai.  
Mi alora ere popo e  
poc sai de pi, e po i dis che  
*"manco se sà, manco se parla"*  
sianca da alora  
ai nparà a di su rosare.

*(Canal)*

MASSIMO MOSENA NONI (1966)

**Belum.**

An grant ospedaal,  
an scur tribunaal,  
al Liston sempre ùoit;  
t ees burta, Belum.  
Na scola stentada,  
doi amighi da bar,  
e cotante bausie;  
te odie, Belum.

Doi ùoge turchin,  
i cavei come al sool,  
e an cùor grant così.

Se pùol catà l oro,  
anca andoe no n é gnà;  
grazie tante, Belum!

*(Zoldo)*

ADEODATO PIAZZA NICOLAI (1944)

**Doe righe.**

L é passou tanto tenpo  
da l'ultima ota che te  
me as scritto na poesia,  
vuó dì che la musa  
è scanpada senza  
lassame n recapito, ma  
te sas meio de me che  
la sparisse cuanche la vuó  
senza lassate nianche  
na sbava. Forse la vò  
tel polo nord a rienpisse  
de robe nuove o forse l à  
solo bisuoi de riposasse.  
No sei proprio dite e  
dopo duto la me à lassou  
che te scrive doe righe.

Padova, 28 giugno 2006 – 18,06  
*(Vigo)*

GABRIELE RIVA (1975)

**Mare Tera**

Per aete pi da vesin, Tera mea,  
è ciot su en s-cioch torchin  
e l è tastà.  
È ciucià fora l so medol  
e m è restà su su la lenga  
el garp del invern passà  
e l dolzin de l istà che sponta,  
el fret de le to ociade  
e l calt del to grem.

Mare Tera,  
ebi pazenzia co noi, fioi,  
e crìdene, e zìghene  
o inpararon a te cognosse  
co te sarà belche passada,  
a inascordesse del ben che te ne olea  
co te sarà aramai scanpada;  
massa tardi per te ciamà indrio,  
massa bonora per se rangià da soi.

*(Oltach)*



GIOVANNI SOTTASS (1974-2008)

**Orazion.**

Tu che te fesc sofia  
I vento, leà I soroio ogni bonora,  
tu che te me fesc  
caminà  
dì par dì.  
tu,  
iò penso che te sees,  
anche se no sei ce che  
t as gnon, soralduto ci o ce che  
te sos.

Cuanta gueres inze I to  
gnon che i à conbatù!

Epura cuanta `sente che ra  
prea par te con tante gnomes  
da cuanta boces che I é stà  
bestemà I to gnon!

Ió no sei cemodo te preà,  
cemodo vardà ves de te,  
iò poi solo te dì gramarzé par me fei  
vive  
ogni momento e no  
conta cemodo che see  
i mè dis!  
Fosc un dì sarei bon  
de capì ci che te sos, fosc  
t ei anche tocià,  
ma de seguro ei vedù  
ce che t as fato,

Fosc son massa "pizo"  
par capì I to  
gran projeto, o fosc  
cissà, gnanche tu no t as  
un projeto.

Tu te sas quanto difizile che I é  
tirà inaante dì par  
dì,  
esse boi de stà par sora!

Cissà, mangare ades te sos drio  
a te sofeà inze I mar par me  
e no te me conosces.

A ra fin pos te dì  
solo chesto:  
Cissà?

*(Anpezo)*

MARCO ZAMBELLI MARIANI (1984)

**A la roda da filé.**

Zli lenti sèri d invernù tu t scultà  
la os d omi e fèmnì che parlà  
zla ciauda stua ch cinì li famei unidi  
t avé senpar al to laoru fin ch li candèli ne n era fnidi.

Dop zèna al pe d na fèmnà te dadé al via  
e tu t girà senza mai fèi fadia.  
Ne n era sufas o pultroni anò puié al cu,  
duci sentad su li banci coi canai aped du.

La fèmnà pi vecia tacà cul so litani,  
chi etar rispundé e i canai vaità da sanburdi.  
Ma alolu na spieda par traversu arvà  
alora anch leri rispundé pur da na ciapà.

Te puié la bela lana bianca sora  
e tu n bel filu t fadé gni fora.  
T er cuntenta da sta là z cla bela stanza  
parchè era armonia, cuntentèza e anchi spranza.

Cu avé dit su l ultma urazion  
tacà a fèi di la lènga par nautra cunfession.  
Liò zal ciaudu dut li puzi dal peis passà  
e sul soraformu i pi dogn tiré na rèia par scultà.

Co calcdugn tacà n discorsu sgnal proibù  
na vecia ricurdà alolu dl erba vèrda liò sentada du.  
Alora i noni cuntà li stori, calcduna vèira e etar inventadi,  
parlà dal diau, strii, malspirti e di lupi zli stradi.

E ntantu ch tu t filà con pazienza e custanza  
i canai spalancà i vui e la paura fadé gni mal d panza.  
Pensà alolu d can ch i dirà su z canbra  
e sprà da na ved al diau ciapà na sanba.  
Al pi bulu a ved li boci vèrti e i vui fora du  
tiré n bagaru csi duci sutà su.  
Na bela risata sunpi i vec fiodar dal tenpu scuridi  
t tu t la gudè a vèd su duti cli boci chi bei sorisi.  
E ntantu gné l ora da ciapà li sali par di a durmì  
e anch la lana ormai era bel davoì a fnì.  
Da l armer a muru sgnal d agadvita tlè  
e par scongiurè i malani na goza duci buè.

Fnì csi al to laoru, la serata e la durnada,  
Duc dé a durmì cuntenti par la bela ciacarada.  
Ades, cara, dut chèstu tu n t pes pi vèdi,  
É canbiad i tenpi e n è nanch pi fèdi.

Cuntentiti se calcdugn te ricorda ncamò  
o se te bèti par blèza arenti a n comò.  
Gnarà li generazion che n savarà pì a che ch t servì,  
ma n stà preocupati, che cul ricordu n te faron mai murì.

17 d mai dal 2005

*(Ciandidi)*